

'PERJUANGAN YANG BELUM SELESAI'

PERJUANGAN YANG BELUM SELESAI

Sesungguhnya tidak ada yang lebih menyayat dari melihat bangsaku dijajah

Tidak ada yang lebih menyedihkan dari mebiarkan bangsaku dihina

Air mata tiada ertinya sejarah silam tiada maknanya sekiranya bangsa tercinta terpinggir dipersenda dan dilupakan

bukan kecil langkah wira bangsa para pejuang kemerdekaan bagi menegakkan kemuliaan dan darjat bangsa

Selangkah bererti mara mengharung sejuta dugaan

Biarkan bertatih asalkan langkah itu yakin dan cermat bagi memastikan negara merdeka dan bangsa terpelihara

Air mata sengsara mengiring setiap langkah bapa-bapa kita

Tugas kita bukan kecil kerana mengisi kemerdekaan rupanya lebih sukar dari bermandi keringat dan darah menuntutnya

Lagi pula, apalah ertinya kemerdekaan kalau bangsaku asyik mengia dan menidahkan, mengganggu dan membenarkan kerana sekalipun bangganya negara kerana makmur dan mewahnya, bangsaku masih melata dan meminta-minta di negara sendiri.

Bukan kecil tugas kita meneruskan perjuangan kemerdekaan kita kerana rupanya selain memerdekakan, mengisi kemerdekaan itu jauh lebih sengsara.

Bangsaku bukan kecil hati dan jiwanya

Bukankah sejak zaman berzaman mereka menjadi pelaut, pengembara malah penakluk terkemuka?

Bukankah mereka sudah mengembangkan sayap menjadi pedagang dan peniaga selain menjadi ulama dan ilmuan terbilang?

Bukankah bangsaku pernah mengharung samudera menjajah dunia yang tak dikenal

Bukankah mereka pernah menjadi wira serantau yang tidak mengenal erti takut dan kematian?

Dimanakah silapnya sehingga bangsaku berasa begitu kecil dan rendah diri?

Apakah angkara penjajahan?

Lalu bangsaku mulai melupakan kegemilangan silam dan sejarah kegemilangan membina empayar

Tugas kita belum selesai rupanya

Bagi memartabatkan dan memuliakan bangsa kerana hanya bangsa yang berjaya akan sentiasa dihormati

Rupanya masih jauh dan berliku jalan kita bukan sekadar memerdekakan dan mengisinya tetapi mengangkat darjat dan kemuliaan buat selama-lamanya.

Hari ini, jalan ini pasti semakin berliku kerana masa depan belum tentu menjanjikan syurga bagi mereka yang lemah dan mudah kecewa

Perjuangan kita belum selesai kerana hanya yang cekal dan tabah dapat membina mercu tanda bangsanya yang berjaya

Oleh: Datuk Seri Dr Mahathir Mohamad (Perdana Menteri Malaysia)



Tun Dr Mahathir Mohamad

KETIKA Tun Dr Mahathir Bin Mohamad menjadi Perdana Menteri dan juga Presiden UM NO, beliau telah meluahkan perasaan kecewa nya terhadap sikap orang-orang Melayu yang tidak mahu berubah. Beliau terpaksa menasi hati, merayu, memujuk dan menangis kerana memikirkan nasib bangsa Melayu dimasa akan datang kerana biarpun telah diberi pelbagai bantuan dan bimbingan, pencapaian orang Melayu dalam semua bidang terutama sekali di dalam bidang ekonomi masih di takuk lama atau terci cir jauh tanpa perubahan.

Di salah satu Perhimpunan Agung UMNO, Dr. Mahathir telah membacakan sebuah puisi yang bertajuk "Perjuangan Yang Belum Selesai" yang bertujuan memberi kesedaran dan mungkin juga semangat untuk mengubah sikap bangsa Melayu. Di sini disiarkan puisi tersebut untuk dihayati bersama.